



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK



Vogošća, ul. Jošanička br. 80, tel: 00387 33 586-411

Na osnovu člana 15. Zakona o principima lokalne samouprave u Federaciji Bosne i Hercegovine („Službene novine Federacije BiH“, broj: 49/06 i 51/09), člana 71, 124. i 125. Statuta Općine Vogošća („Službene novine Kantona Sarajevo“, broj: 27/14 – Prečišćeni tekst i broj: 14/15, 9/20 i 23/24), člana 171. Zakona o socijalnoj zaštiti, zaštiti civilnih žrtava rata, zaštiti porodice sa djecom („Službene novine Kantona Sarajevo“, broj: 38/14 – Prečišćeni tekst, 38/16, 44/17, 28/18, 52/21, 40/22 i 13/25), Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije BiH“, broj: 37/24) i Odluke Općinskog načelnika o načinu primjene smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine, broj: 02-02-575/25 od 15.04.2025. godine, Općinski načelnik Općine Vogošća, donosi:

P R A V I L N I K

O OSTVARIVANJU PRAVA NA JEDNOKRATNU NOVČANU POMOĆ OBOLJELIM OD CELIJAKIJE

Član 1. (Predmet Pravilnika)

Pravilnikom o ostvarivanju prava na jednokratnu novčanu pomoć oboljelim od celijakije (u daljem tekstu: Pravilnik) utvrđuju se načini, uslovi i visina jednokratne novčane pomoći, kao i postupak ostvarivanja prava na jednokratnu novčanu pomoć oboljelim od celijakije sa područja općine Vogošća.

Član 2. (Pravo na ostvarivanje jednokratne novčane pomoći)

Pravo na jednokratnu novčanu pomoć mogu ostvariti lica uz ispunjavanje sljedećih uslova:

- (1) da je lice državljanin Bosne i Hercegovine;
- (2) da lice ima prijavljeno prebivalište na području općine Vogošća najmanje 1 (jednu) godinu neposredno prije podnošenja prijave na javni poziv iz člana 4. ovog Pravilnika;
- (3) da je lice oboljelo od celijakije.

Član 3. (Sredstva)

- (1) Sredstva za dodjelu jednokratne novčane pomoći oboljelim od celijakije utvrđuju se u Budžetu Općine Vogošća (u daljem tekstu: Budžet Općine) za tekuću godinu.
- (2) Raspodjela novčanih sredstava vršit će se u skladu sa raspoloživim sredstvima predviđenim za ovu namjenu.

Član 4. (Javni poziv i potrebna dokumentacija)

- (1) Sredstva predviđena za ove namjene dodjeljuju se na osnovu javnog poziva koji se objavljuje na oglasnoj ploči i web stranici Općine i ostaje otvoren do kraja tekuće kalendarske godine ili do utroška planiranih budžetskih sredstava.
- (2) Jednokratna novčana pomoć dodijeljivat će se na osnovu podnesenih zahtjeva.
- (3) Zahtjevi se podnose se Službi za boračko-invalidsku i socijalnu zaštitu.

(4) Zahtjevi se rješavaju po redoslijedu podnošenja.

(5) Dokumentacija koju je potrebno priložiti uz zahtjeve biće navedena u obrascu koji je sastavni dio javnog poziva.

Član 5. **(Visina jednokratne novčane pomoći)**

1) Jednokratna novčana pomoć se dodjeljuje korisnicima u iznosu od 700,00 KM.

2) Jednokratna novčana pomoć može se dodijeliti korisniku jednom u toku kalendarske godine.

Član 6. **(Postupak za ostvarivanje prava)**

1) Postupak za dodjelu jednokratne novčane pomoći provodi nadležna služba.

2) Nakon što nadležna služba utvrdi da su ispunjeni propisani uslovi, Općinski načelnik putem nadležne službe donosi Rješenje.

3) Zahtjevi koji ne ispunjavaju propisane uslove, kao i zahtjevi podneseni nakon utroška planiranih sredstava, odbijaju se Zaključkom Općinskog načelnika putem nadležne službe.

4) Protiv Zaključka može se izjaviti žalbu Drugostepenoj stručnoj komisiji Općinskog vijeća u roku od 15 dana od dana prijema akta.

5) Podneseni zahtjev važi samo za kalendarsku godinu u kojoj je podnesen.

Član 7. **(Obrasci prijave po Javnom pozivu)**

Nadležna služba izrađuje obrazac zahtjeva za javni poziv sa popisom potrebne dokumentacije, koji čini sastavni dio javnog poziva.

Član 8. **(Isplata jednokratne novčane pomoći)**

Isplata se vrši na transakcijski račun podnosioca zahtjeva putem Službe za budžet i finansije.

Član 9. **(Prestanak)**

Stupanjem na snagu ovog Pravilnika, prestaje da važi Pravilnik o ostvarivanju prava na jednokratnu novčanu pomoć oboljelim od celijakije, broj: 09-31-1240/25 od 13.06.2025. godine.

Član 10. **(Stupanje na snagu Pravilnika)**

Ovaj Pravilnik stupa na snagu narednog dana od dana objave na oglasnoj ploči i web stranici Općine Vogošća.

Broj: 09-31-99/26

Vogošća, 28.01.2026. godine

OPĆINSKI NAČELNIK

Migdad Hasanović